

Script of Morning Gojri News Bulletin 26 January 2025 at 0930Hrs instead of 1015Hrs

ما رنینگ گو جری نیوز بلیٹن مورخہ 26 جنوری 2025

یوہ آکا شوانی جموں ہے باغ علی طاہر تیں خبر سنو۔

R Day Main

قوم آج 76 ووں یوم جمہوریہ منارہی ہے۔ صدر جمہوریہ درویدی مُرمو کرتویا پاتھنوی دہلی تیں یوم جمہوریہ منان غو آغاز کرتاں واں قوم غی قیادت کریں گی۔ یوم جمہوریہ غی پریڈ سویر ساڈا 10 بجے شروع ویگی۔ جہیڑی قریب ڈیڑھ گھنٹہ توڑی جاری رہ گی۔ یوم جمہوریہ غی پریڈ وزیر اعظم نریندر مودی غی طرفوں قومی جنگی یادگار ور پھلاں غی چادر پیش کیا جان غے نال ہی شروع ہو جا نیگی۔ صدر جمہوریہ درویدی مُرمو کرتویا پاتھ غا مقام ور اک روایتی بگئی مانہ آویں گی۔ جت وے مارچ پاسٹ ور سلامی لیں گی۔ اس مارچ پاسٹ مانہ مسلح افواج، نیم فوجی دستا، معاون سول دستا، این سی سی تے این ایس ایس غا دستا شامل ویں گا۔ یوم جمہوریہ غی یاہ تقریب 47 ائر کرافٹس غا فلائی پاسٹ سنگ اختتام پزیر ہو جائے گی۔

R-Day JK

جموں کشمیر مانہ وی آج 76 ووں یوم جمہوریہ منایو جا رہیو ہے۔ اس موقع ور حفاظت غا تگڑا بندو بست کیا گیا ہیں۔ مولانہ آزاد سٹیڈیم جموں غے آس پاس حفاظتی بندو بست تگڑا کیا گیا ہیں، جت لیفٹنٹ گورنر منوج سنہا ترنگو لہراویں گا۔ جد کہ وزیر اعلیٰ عمر عبداللہ اس موقع ور مہمان خصوصی غا طور ور تقریب مانہ شامل ویں گا۔ عہدیداراں نے جانکاری دیتاں واں دسیو ہے جے ڈرونز تے سپاٹرز جموں کشمیر مانہ اس موقع ور حفاظتی بندو بست غو حصو ویں گا۔ اسے دوران چار کا بینہ وزیر جاوید احمد ڈار، سکینہ اتو، ستیش شرما تے جاوید احمد رانا بالترتیب بارمولہ، اننت ناگ، کٹھوعہ تے اُدھم پور مانہ یوم جمہوریہ غی تقریب مانہ سلامی لیں گا۔ اس توں علاوہ جموں کشمیر غا باقی 14 ضلعان مانہ ضلع ترقیاتی کونسلان غا ڈی ڈی سی چیرپرسن ضلع صدر مقامات ور تقریبات مانہ مارچ پاسٹ ور سلامی لیں غی رسم ادا کریں گا۔

Padma Awards

صدر جمہوریہ درویدی مُرمو نے سال 2025 واسطے 139 پدما ایوارڈ نانہ منظوری دے دی ہے۔ ان انعامات غی فہرست مانہ 7 پدما وبھوشن، 19 پدما بھوشن تے 113 پدما شری ایوارڈ شامل ہیں۔ یہ ایوارڈ حاصل کرن آلاں مانہ 23 خواتین اور این آر آئی، پی آئی او تے او سی آئی ضمیرہ غا غیر ملکی شہری وی شامل ہیں۔ پدما ایوارڈ حاصل کرن آلاں مانہ 13 ایوارڈ بعد از مرگ دتا جائیں گا۔ جموں کشمیر تے لداخ تیں معروف لکھاری، معلم تے جموں غی ڈوگر ثقافت غا پھرے دار پروفیسر لٹ منگوترہ، کشمیری کانی شال غا معروف فنکار فاروق احمد میر تے لداخ تیں بودھ راہب مرحوم لوب زنگ نانہ پدم شری ایوارڈ سنگ نوازیو جا رہیو ہے۔

NITI Ayog

جموں کشمیر غا ضلع راجو ری غا بدھال گراں مانہہ حال ہی مانہہ ہون آلی غیر فطری اموات تیں بعد جموں کشمیر سرکار نے صورتحال ور قابو پان غی خاطر کا روانی کی ہے۔ اس توں علاوہ مرکزی سرکار غی وزارت داخلہ وی صورتحال غی نگرانی کر رہی ہے، جس نے حال ہی مانہہ اک بین محکمائی کمیٹی غی ٹیم بدھال روانہ کی تھی، تانجے اس بحران سنگ نمڑن مانہہ جموں کشمیر ٹیم غی مدد کی جا سکے۔ جموں کشمیر سرکار غی درخواست ور نیتی ایوگ غا ممبر ڈاکٹر وی کے پال نے قومی تے مقامی ماہرین غی ٹیمیں غی اک مشترکہ میٹنگ غی صدارت کی۔ جس مانہہ اس بحران غو حل تلاش کیا جان ور غور کیو گیو۔ میٹنگ غے دوران اموات غی وجہ غو پتو لان تے اس بیماری ور قابو پایا جان بارے اقدامات ور غور کیو گیو، تانجے مزید اموات تیں بچو جا سکے۔

Holiday

جموں کشمیر سرکار نے کل شبِ معراج غا سلسلہ مانہہ 27 جنوری یعنی سوموار نانہہ کی جان آلی سرکار چھٹی نانہہ ملتوی کر غے 28 جنوری منگلوار آلے روز کیا جان غو حکم جا ری کیو ہے۔ یوہ حکم نامو سرکار غا کمشنر سیکریٹری غی طرفوں جا ری کیو گیو ہے۔ اس راہ ہن شبِ معراج غا سلسلہ مانہہ کی جان آلی سرکار چھٹی 28 جنوری نانہہ ویگی۔

Kashmir Train

وندے بھارت ایکسپریس غو شری ماتا ویشنو دیوی ریلوے سٹیشن کٹڑھ تیں بڈگام توڑی غو آزمائشی سفر کامیابی سنگ مکمل کر لیو گیو ہے۔ ریلوے محکمہ غا افسران نے جانکاری دیناں واں دسیو ہے جے یاہ ریل گڈی جمعہ آلے روز کٹڑھ ریلوے سٹیشن ور پُجی تھی، جہیڑی کل سرینگر پُجی تے بعد مانہہ واپس کٹڑھ روانہ ہو گئی۔ سرینگر شمالی ریلویز غا چیف ایریا منیجر ثاقب یوسف غو کہنو تھو جے وزیر اعظم نریندر مودی غو ریلویز غے ذریعے کشمیر نانہہ ملک غا دوجا حصال سنگ جوڑن غو خواب ہن پورو ہو گیو ہے۔

SED Ban

محکمہ تعلیم نے اپنا افسران تے ملازماں نانہہ کسے وی سیاسی جماعت یاہ تنظیم غی ریلیاں تے پروگراماں مانہہ طالب علماں نانہہ شامل ہون غی اجازت دین ور روک لا دتی ہے۔ اک سرکار حکمنامہ مانہہ محکمہ نے ہدایت کی ہے جے چیف ایجوکیشن افسران، زونل ایجوکیشن افسران تے اسکولاں غا سربراہاں سمیت محکمہ غا تمام افسر، طالب علماں یاہ سٹاف نانہہ جن مانہہ ٹیچر وی شامل ہیں کسے وی سیاسی ریلی یاہ پروگرام جہیڑو کسے سیاسی جماعت یاہ تنظیم غی طرفوں منعقد کیو گیو وے مانہہ شرکت غی ہدایت یاہ اجازت نہ دیں۔

اس غے نال ہی خبراں غو یوہ بلیٹن ختم ہوو۔